

INTRODUCCIÓN

Elaborados nun contexto económico e financeiro adverso, os Orzamentos da Comunidade Autónoma de Galicia para 2010 están enfocados á loita contra a tendencia contractiva da economía e ao mantemento de actuacións que permitan avanzar na dirección dunha economía máis produtiva e autosostible.

Os efectos da caída xeral da actividade na produción e no emprego no ano 2009 transmitíranse en 2010 ás finanzas públicas da Comunidade, que ten que afrontar o aumento das necesidades de bens e servizos públicos e de prestacións sociais ineludibles na actual situación contando con menores ingresos tributarios e máis reducidos volúmenes de achegas e transferencias dos ingresos do Estado.

Ante esta complicada situación, a política económica elixida polo goberno adquire un marcado carácter anticíclico, apurando as fontes de ingresos e dirixindo as prioridades do gasto ao mantemento dos tecidos económicos galegos sen renunciar a seguir medrando e gañando en produtividade no seu atallo hacia a converxencia.

Para saír reforzada da crise, Galicia debe esforzarse en recuperar niveis positivos de actividade e emprego no tempo máis curto posible, e pode facelo mantendo diferenciais favorables con relación ao conxunto da economía española.

Ambos obxectivos, que non por ser ambiciosos deixan de ser realistas, requiren dunha política fiscal definida, clara e eficaz. E este é o espírito contido nuns orzamentos que atenden ás recomendacións dos principais organismos económicos de soste un esforzo cuantitativo e cualitativo no gasto: reforzando os mecanismo de solidariedade coas persoas máis afectadas pola evolución económica, promovendo un modelo de desenvolvemento baseado na economía do coñecemento e da competitividade, introducindo estímulo impositivos que respecten a dispoñibilidade da renda das familias; e mantendo o recurso ao endebedamento dentro dunha senda prudente que non resulte gravosa para o momento no que a economía recupere a normalidade.

Os orzamentos para 2010 conteñen claros elementos de solidariedade e cohesión social, pois non se pode falar de progreso e crecemento se non se practica dende o inicio unha política de igualdade e de solidariedade que beneficie a todos aos que contribúen ou xa contribuíron a conseguilo. O pulo das políticas de cohesión social vértase no mantemento en primeiro termo dos servizos de sanidade e educación, e gaña músculo co fomento das políticas activas de emprego e cun ambicioso programa de benestar, igualdade e atención a dependencia.

Pero os orzamentos para 2010 son máis ambiciosos, xa que afrontan a realidade e máis non renuncian aos fins do programa de goberno. Erguéndose por enriba das dificultades da coxuntura e das trabas no financiamento, hai neles un lugar para saírmos da crise e manter o pulso da dinamización do noso tecido produtivo: axudando a restablecer os canles do crédito e financiamento ás familias e ás empresas, incentivando os investimentos creadores de riqueza e emprego, introducindo novas técnicas de información, perfeccionando as infraestruturas de comunicación, transporte e loxística, e, sobre todo, demostrando confianza e insistindo na formación do capital humano, apoio as iniciativas, dinamización empresarial, e aumentando a capacidade para innovar, para competir.

Os orzamentos, en síntese, están formulados arredor dunha ecuación simple, sinxela: solidariedade e investimento como sumandos que conducen a un resultado positivo, de crecemento, e a unha dirección atinada, a unha Galicia global, aberta e próspera.

Estes orzamentos serán os primeiros que se formulen cunha contracción do gasto total na historia da Autonomía. Desde a austeridade e a coidada identificación de prioridades nas actuacións que neles se propoñen, reflicten tamén a concepción do goberno de Galicia sobre unha sociedade próspera, solidaria, persistente a pesares das eivas na perfección dun modelo de crecemento baseado no coñecemento e na sostibilidade.

Queren tamén estes orzamentos ser dos primeiros coherentes cun modelo compartido de cohesión social e de equilibrio territorial, porque no proceso de modernización da economía e da sociedade de Galicia hai un lugar e unha misión para tódolos axentes privados e para cada unha das administracións.